

't Herenhoentien



BESTE KIENDER!

In et veurige Herenhoentien ston et begin van een verhael over Piepmoes. Dat hiette *Piepmoes en de belon*, weten jim et nog? Jammer genoeg konnen Sietske, Saskia, Bart en Jan mar gien mooi aende an dat verhael bedadenken.

Daoromme weren ze hatstikke bliede, doe ze van de kiender uut groep drie van de Boekhorst-schoele in Oosterwoolde alderhaande oplossings kregen. Een pat daorvan staot now in dit Herenhoentien. Knap, hen? Daank, jongen en maegies van de Boekhorstschoele.

In de oflopen zomer het Piepmoes verscheiden keer in de Lende zwommen. Et was ok zo alderheiselikste waarm! Last van Klaos de kaeter en Miep, et vrundinnegien van Klaos had Piepmoes haost niet. Mit zok waarm weer liggen katten vaeke languut en lamlendig in et schaad te soezen. En mit die waarmte hadden ze ok niet zoveul zin an eten. Een peer brokkies en een koemegien drinken hadden ze meer as genoeg an. Mar of dat altied wel zo blift... In et ni'je verhael over Piepmoes krigt oons moesien twie ni'je vrunden. Dat dat mar goed is, zullen jim vast wel mit oons iens wezen aj'm et verhael heuren.

Bi'j 't Herenhoentien zitten dit keer vier inlegvellen. Op twie van die vellen staon hiele mooie trekpoppies. Hoe aj' die maeken moeten staot op een eer vel. Op et dadde vel het Saskia een spannend spellegien tekend. Et liekt wel wat op *Mens erger je niet*, ziej'm wel? Om et spellegien te speulen hej' o.e. pionnegies neudig. En die kuj' zels ok maeken, kiek mar es gauw op et vierde inlegvel. Daor staot ok percies op, hoe as alles moet! Wi'j weensken jim vanzels weer een hiele bulte plezier mit 't Herenhoentien. Tot van 't winter!



PIEPMOES KRIGT NI'JE VRUNDEN.

Een veurleesverhael van Sietske Bloemhoff.

Et is ien van de laeste septemberdaegen. Buten is et waarm. Niet zo waarm meer as van 't zommer, mar nog wel waarm genoeg om nog evenpies lekker in de Lende te zwemmen, vint Piepmoes. Douk is et winter en dan kan et niet meer. Vleden weke is Piepmoes d'r ok een peer keer henne west, tegere mit de voegels en dat het him mar best voldaan.

Opgeruumd stapt de moes de tuun uut, de bos in. Nao een posien komt hi'j et roodbossien en de gele gouwe tegen en vragt as ze mit gaon. Mar jammer genoeg kun die niet, want ze zollen krek even naor de doeve toe. De doeve het him vleden weke nao et zwemmen een betien verklumen laoten, dat now vuult hi'j him niet al te lekker. "Weens him mar beterschoep", zegt Piepmoes, "en zeg mar dat ik mórgen wel even langes kom." Dat praoten ze of en Piepmoes gaot veerder, naodat hi'j de voegels beloofd het goed uut te kieken veur de katten.

As hi'j halverwege is en langs de duustere bos lopt, daenkt hi'j onwillekeurig an een peer jaor leden. Doe was hi'j daor hasems an et neutieszuken en mos hi'j him hadde verstoppen veur de katten die him weer es nao zatten. Hi'j is doe op 'e kop in een sloot roegeld, mit de zak mit neuties achter him an. Et is gelokkig goed beteerd, mar wat het hi'j et benauwd had! Gelokkig is d'r now gien katte in velden of wegen te bekennen. Temeensen...

An de ere kaante van de duustere bos lopen acht poties. Acht kattepoties, moej'm weten. Vier zwatte en vier witte kattepoties. Now, now weten jím wel hoe laete et is. De vier zwatte poties bin van Klaos de kaeter en de vier witte van Miep, et vrundinnegien van Klaos. Ze willen es zien as ze wat veerder van huus niet makkeliker moezen pakken kunnen. Die verhipte Piepmoes is heur toch altied te glad of, en ze hebben knap honger. Now liekt et vanzels niet zo slim. Piepmoes an de iene kaant van de bos en de beide katten an de ere kaante. En de bos is hiel duuster, dat hebben we jim al verteld, dat ze kun mekaander niet zien. Mar wie de bos van Piepmoes kent, wet dat et pad daor de katten lopen, mit een grote bocht op et pad daor Piepmoes is, uitkomt. En krek bin de katten die bocht deur, of ze zien in de veerte Piepmoes lopen.

"Wel verhip!" raost Miep. "Moej' kieken Klaos, as dat Piepmoes niet is die daor lopt. Hi'j gaot vast naor de Lende toe. Kom op, d'r achteran. Lao'we et nog ien keer perberen. Hi'j is hielendal alliend en zo veer van huus, dat et kan haost niet mis gaon." "Ho, ho, kalm an Miep," mauwkt Klaos. "We hebben him al es eerder naozeten bi'j de Lende en doe gong et falliekant mis. Doe sprong hi'j gauw op de pompeblaeden die op et waeter dreven en hadden wi'j et naokieken. Dat moe'we now veurkommen. Wi'j moe'n zorgen dawwe as eerste bi'j de Lende binnen, dan waachten we him achter een peer gróspollen op. As dat lekkere happien dichte genoeg bi'j oons is, griepen we him in ien keer!" Miep moet toegeven, dat Klaos zien plannegien niet verkeerd liekt. Zo hadde as ze kunnen lopen de katten dwas deur de bos naor de Lende toe. Op die meniere zicht Piepmoes heur niet.

Klaos en Miep liggen nog mar krek achter een peer pollen te poesten as Piepmoes d'r an stappen komt. Hi'j besluit om vot-en-daolik in et koele waeter te duken. En juist nemt hi'j een anlopieren of daor klinkt me een geraos en gekrijs, niet mooi meer! Mit grote sprongen en woeste geluden kommen de katten op Piepmoes of. Now lokt et die aekelike katten zeker tóch om et moesien te pakken en op te eten.

Dan begint inienend et waeter van de Lende ommeraek te klotsen. Et waeter spat alle kaanten op en de katten wo'n kletsnat. En katten hebben een gloepende hekel an nat wodden. Ze kieken doodsbenauwd naor twie dweildeurnatte gedaonten die uut de Lende springen en die grommende en grauwendende op heur anvliegen kommen. Et bin twie honnen en ze bin allemachtige lelk. "Maek daj'm votkommen, smerige snetkatten daj'm binnen," gaon ze tekeer. "Kuj'm wel? Kleine moesies pakken, hen? Now, dat zullen we jim wel es even ofleren!" En ze jaegen Klaos en Miep een hoge boom in. Ien van de honnen blijft onder de boom zitten om d'r veur te zorgen dat de katten d'r niet uutnaaien. De ere hond lopt naor Piepmoes. "Stil mar, heur moesien," zegt et hontien, "wi'j doen jow niks. Gao mar gerust zwemmen, dan holen wi'j de boel wel in de gaten. De katten kun zo niks beginnen." "Dank-je-wel hond," zegt Piepmoes, "dat jim de katten verjaegd hebben. Ze willen mi'j altied pakken en opeten. Mar wie bin jim aenlik, ik heb jim nog nooit zien!"

"Now," zegt de hond, "dat za'k je gauw vertellen. Wi'j bin Diedel en Daweltien. Daweltien zit daorginderd en ik bin Diedel. Wi'j wonen sund een posien an de ere kaante van de Lende. Oonze



baos het oons uut et asiel haeld, doe zien veurige hond doodgaon is. Vandaag zo'k Daweltien et zwemmen leren, want dat kon hi'j nog niet. Hi'j het vroeger bi'j meensken woond die him nooit mitnammen naor et waeter. Dat aenlik was hi'j daor oe zo bange veur. Hi'j zat krek hiel veurzichtig mit zien ti'jgies in et waeter te vulen, doe ie d'r ankwammen. Op etzelde mement zag hi'j de katten en wat ze van plan weren. Daweltien wodde zo deur alles henne leik, dat hi'j hielendal vergat dat hi'j bange veur waeter was en nog nooit zwommen had. Hi'j ploempste zo in ien keer in de Lende en zwom zonder veerder nao te daenken naor disse kaante. Ik hoef him et zwemmen dus niet meer te leren, goed hen? Mar gao ie now mar gauw even zwemmen, eers is et douk te koold. Aj' et nocht d'r of hebben, breng ik je wel naor huus. Daweltien hooit zolaank de katten wel in et vezier.

En zo gebeurde et. Doe Diedel en Daweltien weer tegere op huus angongen, was et al niet zo vroeg meer. En de katten? Die kwammen pas diepe in de naacht thuus, want ze vertrouwden et eerst niks, doe de honnen vot weren. Ie wussen ja niet of ze misschien toch niet weeromme kwammen...

En Piepmoes? Piepmoes lag, doe de katten uut de boom klauterden, al twie laank en twie bried te slaopen en droomde over zien ni'je vrunden Diedel en Daweltien!

ET VERVOLG VAN PIEPMOES EN DE BELON.

In 't Herenhoentien van de veurige keer ston et begin van et verhael *Piepmoes en de belon*. Sietske, Saskia, Bart en Jan konnen gien mooi aende bedaden en vreugen of jim ok wat wussen. De kiender van groep 3 van de Boekhorstschoele hebben allegere wat bedocht en opschreven. Een stok of wat verhaelties staon hier onder. En aj'm niet krek meer weten hoe as et verhael ok al weer begon, moet juf of meester dat eerst nog mar een keer veurlezen!

Liesbeth bedocht:

*Piepmoes vligt deur de locht.
Hi'j vligt naor een onbewoond
eilaand. Hi'j kan d'r niet meer weg.
Mar gelokkig komt de doeve d'r an en
de gele gouwe. Piepmoes mag op de
gele gouwe en doe weren ze thuus.*

Et volgende is van Erwin:

*Piepmoes gaot de locht in en hi'j hoolt
de belon goed beet.
Mar dan BAM hi'j gaot knoerhadde naor
beneden in een vaort.
Hi'j gaot naor de zee, en dan:
Kiek uut Piepmoes, een haai.
Mar de haai is al dood.
Piepmoes zwemt naor een eilaand.
Hi'j is doodmu, hi'j vaalt in slaop.
Hi'j zegt, waar bin ik?
Op een eilaand. Ik wil vot.
Ik maek een vlot, ik gao morgen vot.
Waar is mien vlot? Et is vot.
Mar wat is dat? Een echte boot.
Daor komt de boot al an.
Doei eilaand!*

Janine bedocht d'r nog een beest bi'j:

*Piepmoes blaost en blaost.
Piepmoes hoolt de belon goed vaaste en
vligt omhogens.
Dan vaalt hi'j op een walvis en de
walvis brengt Piepmoes
naor de kaante en dan gaot
Piepmoes naor huus toe.*


Bart (ja, van de Boekhorstschoele en niet die van 't Herenhoentien!) schreef:




*Net doe de moes nog ien keer hiel hadde
blaozen wol... doe begon et hiel hadde te
wi'jen boven de bomen en wie kwam daor
an zweven. Et is de gele gouwe. En dan
ropt Piepmoes hiel hadde.
"Help, help," ropt Piepmoes.
Daor komt de gele gouwe al an, mar die
kan Piepmoes niet allierendregen.
Hi'j ropt de doeve en et roodbossien. Now
kun ze him wel dregen.
Ze brengen Piepmoes weeromme naor
huus.*


Jim zien hieronder een hieleboel twieling-herenhoenties. Kun jim van elk herenhoentien et twieling-zussien of twieling-bruurtien vienen?



't Herenhoentien wodt uutgeven deur de Intergemientelike Begeleidingsgroep Hiemkunde in Oost- en West-Stellingwarf. An dit Herenhoentien warkten Saskia Douma, Sietske Bloemhoff, Bart Beltman en Jan de Vries mit.














OOST-STELLINGWARF


WEST-STELLINGWARF



OOST-STELLINGWARF


WEST-STELLINGWARF





ET MAEKEN VAN EEN TREKPOPIEN.

Kleur eerst alle onderdelen van et poppien en knip ze dan zo netties meugelik uut. Maek op 'e plakken waar een krusien staot een klein gattien. Dat kuj' zels doen, mar misschien het juf of meester ok wel een perforator. Leg dan de juuste onderdielen op et goeie plak op mekeer en maek ze an mekeer vaaste mit een splitpennegien. Om d'r vot-en-daolik mit beginnen te kunnen hebben we an dit inlegvel een zakkien mit daorin vuuf van die pennegies daon! Veur et maeken van ien zo'e'n poppien hej' die vuft neudig. Butendat hej' ok een touwgien neudig, mar dat hebben ze bi'j jim op schoele vast wel. Aj' de splitpennen deur de gatties daon hebben bleven d'r nog vier gatties over (zie tekening); deur die gatties komt straks et touwgien. Veurdaj' et touwgien deur de overbleven gatties doen, moej' de aarmpies en bientes zo dichte meugelik tegen mekeer leggen. Dan kuj' de touwgies vaaste maeken. Vervolgens bien ie nog een touwgien tussen beide draoties en laoj' an de onderkaante een stokkien touw hangen. Aj' alles goed daon hebben en an et touwgien trekken gaon de aarmpies en bientes van et poppien henne-weer!!!



ET MAEKEN VAN DE PIONNEGIES EN ET SPEULEN VAN ET SPEL.

Om et spellegien te speulen hej' per speulder drie pionnegies van dezelve kleur neudig. Daorveur kuj' vanzels bestaonde pionnegies gebruken, mar ie kun ze ok zels maeken. Hiernaost staon twaelf van die pionnegies, die as de vorn van een vlaggien hebben. Ie kun ze in de kleur kleuren die aj' zels et mooiste vienen. Aj' dat daon hebben knip ie de pionnegies zo goed meugelik uut. Op elk pionnegien staon twee wat dikkere lijnties. Die moej' veurrichtig inknippen. Tot slot moej' et "stokkien" van et vlaggien onthogens vouwen en et pionnegien is klaor! Aj' et spellegien speulen gaon zet ie drie pionnegies van dezelve kleur in een hoekien van et spel op de drie ronties. Veur et spel hej' ok een dobbelstien neudig. Degene die et hoogste tal punten gooit mag beginnen. Ie beginnen op et herenhoentien vlak veur je pionnegien en doen zoveel strappies mit ien vlaggien veuruut as daj' mit de dobbelstien gooid hebben. Et herenhoentien wiest de richting uut die aj' gaon moeten. Ie moe'n now perberen zo gauw meugelik rond te gaon en je pionnegien in et hokkien dat et dichtste bi'j je is te kriegen. Wie as eerste zien drie vlaggiespionnen binnen het is de winner van et spel. D'r is trouwens wel iene hiel vervelende riegel. As ien van de aandere speulders op et plakkien komt waar as jow pionnegien krek staot, moet ie mit jow pionnegien opni'j beginnen. Krek as bi'j et echte *Mens erger je niet!* Ok et spellegien kuj' vanzels mooi kleuren. Et is handig om de hielied de drie ronties in de hoeken en de bi'jneurende hokkies in dezelve kleur te kleuren as de pionnegies. Zo kan elke speulder percies zien waar hi'j of zi'j henne moet. **Veul plezier !!!**